



Anwar menyertai ribuan jemaah menunaikan solat jenazah di Masjid Negara, semalam.

(Foto BERNAMA)

PM, ribuan jemaah sertai solat jenazah

Allahyarham dikebumikan bersebelahan pusara tokoh kenamaan negara

Oleh Essa Abu Yamin dan Ercy Gracella Ajos
bhnews@bh.com.my

Kuala Lumpur: Perdana Menteri, Datuk Seri Anwar Ibrahim semalam, menyertai ribuan jemaah menunaikan solat jenazah buat Allahyarham Tun Abdullah Ahmad Badawi di Masjid Negara, di sini.

Selain Anwar dan ahli keluarga Allahyarham, turut menyertai solat jenazah ialah barisan jemaah menteri, antaranya kedua-dua Timbalan Perdana Menteri, Datuk Seri Dr Ahmad Zahid Hamidi serta Datuk Seri Fadillah Yusuf; Menteri Perlindungan dan Komoditi, Datuk Seri Johari Abdul Ghani; Menteri Pertanian dan Keterjaminan Makanan, Datuk Seri

Mohamad Sabu; Menteri Pendidikan Tinggi, Datuk Seri Dr Zambry Abdul Kadir; Menteri Pelaburan, Perdagangan dan Industri, Tengku Datuk Seri Zafrul Abdul Aziz serta Menteri di Jabatan Perdana Menteri (Hal Ehwal Agama), Datuk Dr Mohd Na'im Mokhtar.

Jenazah Tun Abdullah kemudian diusung keluar dari dewan solat utama Masjid Negara menggunakan keranda yang dilitupi Jalur Gemilang, oleh kumpulan pengusung terdiri daripada pegawai Angkatan Tentera Malaysia dan polis untuk dibawa ke Makam Pahlawan dan disemadikan mengikut Istiadat Pengebumian Negara.

Yang turut hadir wakil kedutaan asing, pemimpin masyarakat dan ribuan rakyat jelata yang menzahirkan rasa kehilangan terhadap pemergian seorang negarawan ulung yang disegani.

Negarawan berjiwa luhur

Allahyarham dikebumikan bersebelahan pusara tokoh kenamaan negara termasuk Perdana Menteri kedua, Tun Abdul Razak Hussein dan Timbalan Perdana Menteri, Tun Dr Ismail Abdul Rahman.

Sementara itu, Ahmad Zahid berkata, Abdullah pastinya akan dikenang sebagai seorang negarawan berjiwa luhur, tenang dalam kepimpinan dan sentiasa meletakkan kepentingan rakyat sebagai keutamaan.

"Sumbangan serta jasa beliau dalam membentuk asas pentadbiran berteraskan integriti dan prinsip Islam Hadhari, akan terus terpahat dalam lipatan sejarah negara" katanya dalam kenyataan di Facebook.

Fadillah pula berkata Abdullah memainkan peranan penting menerusi pelaksanaan Koridor Tenaga Diperbaharui Sarawak (SCORE) serta pelbagai lagi sumbangan lain yang memberi manfaat besar kepada pembangunan Sarawak.

Katanya pihaknya serta mewakili Premier Sarawak, Tan Sri Abang Johari Tun Openg, merakamkan ucapan takziah kepada seluruh ahli keluarga Allahyarham.

Di Kepala Batas, lebih 50 jemaah terdiri daripada penduduk Kepala Batas di Masjid Al Jamiul Badawi, melakukan solat jenazah ghaib untuk Allahyarham.